

## **ՀԱՄԱՁԱՅՆԱԳԻՐ**

### **Հայաստանի Հանրապետության Կառավարության և Բելառուսի Հանրապետության Կառավարության միջև բարձրագույն որակավորման գիտական և գիտամանկավարժական կադրերի ատեստավորման բնագավառում համագործակցության մասին**

Հայաստանի Հանրապետության կառավարությունը և Բելառուսի  
Հանրապետության կառավարությունը, այսուհետ՝ Կողմեր,

ղեկավարվելով գիտական աստիճանների փաստաթղթերի ճանաչման և  
նոստրիֆիկացման, գիտական աստիճանների համադրելիության սկզբունքների մասին  
պայմանավորվածություններով,

ձգտելով պահպանել և զարգացնել գիտական կապերը,

հաստատելով բարձրագույն որակավորման գիտական և գիտամանկավարժական  
կադրերի ատեստավորման բնագավառում համագործակցությունը շարունակելու  
ձգտումը,

պայմանավորվեցին ներքոհիշյալի մասին:

#### **Հոդված 1**

Կողմերը իրենց պետությունների տարածքում ճանաչում են մյուս Կողմի  
համապատասխան պետական որակավորման մարմնի տված գիտական կոչումների և  
գիտական աստիճանների շնորհման մասին պետական նմուշի փաստաթուղթը  
վկայագրեր ունեցողների վերատեստավորման ճանապարհով, Կողմերից  
յուրաքանչյուրի պետության օրենսդրությամբ սահմանված կարգով:

#### **Հոդված 2**

Կողմերի լիազոր մարմինները.

անցկացնում են փոխադարձ խորհրդակցություններ՝ որակավորման ազգային  
համակարգերի զարգացման հայեցակարգի և բարձրագույն որակավորման գիտական և  
գիտամանկավարժական կադրերի որակավորմանը առաջադրված պահանջները, ինչպես  
նաև գիտաշխատողների մասնագիտությունների ազգային ցանկերը (անվանացանկերը)  
մշակելիս,

ապահովում են բարձրագույն որակավորման գիտական և գիտամանկավարժական  
կադրերի ատեստավորման պետական համակարգում գիտական աստիճաններ  
հայցողներին առաջադրվող հիմնական պահանջների համադրելիությունը:

#### **Հոդված 3**

Կողմերի լիազոր մարմինները կզարգացնեն համագործակցությունը բարձրագույն  
որակավորման գիտական և գիտամանկավարժական կադրերի ատեստավորման  
բնագավառում՝

իրենց տարածքի ատենախոսությունների պաշտպանությունների խորհուրդներում  
մյուս Կողմի հայցողների ատենախոսությունների պաշտպանությունների անցկացման  
համար հավասար պայմաններ ստեղծելով,

ժամանակին փոխադարձաբար տեղեկացնելով Կողմերի բարձրագույն  
որակավորման գիտական և գիտամանկավարժական կադրերի ատեստավորման

պետական համակարգում կատարվող փոփոխությունների մասին, փոխանակելով այդ կադրերի ատեստավորման հարցերի վերաբերյալ համապատասխան նորմատիվ ակտեր և այլ նյութեր,

փորձի փոխանակման նպատակով անցկացնելով անհրաժեշտ համատեղ միջոցառումներ՝ բարձրագույն որակավորման գիտական և գիտամանկավարժական կադրերի ատեստավորման ընթացքի կառավարման և կատարելագործման ուղղությամբ:

#### **Հոդված 4**

Ատենախոսությունների փորձաքննության որակը բարձրացնելու նպատակով Կողմերի լիազոր մարմինները աջակցում են՝

մյուս Կողմի ատենախոսության պաշտպանության խորհուրդներում առաջատար գիտնականների և մասնագետների մասնակցությամբ, նաև որպես ատենախոսությունների ժամանակ ընդդիմախոսներ,

մյուս Կողմի ատենախոսության պաշտպանության խորհուրդներում պաշտպանված ատենախոսությունների լրացուցիչ փորձաքննության անցկացմանը՝ իրենց տարածքում ատենախոսությունների պաշտպանության խորհուրդներում:

#### **Հոդված 5**

Հայաստանի Հանրապետության կողմից լիազոր մարմին է սահմանված Հայաստանի Հանրապետության բարձրագույն որակավորման հանձնաժողովը, իսկ Բելառուսի Հանրապետության կողմից՝ Բելառուսի Հանրապետության բարձրագույն որակավորման պետական կոմիտեն::

#### **Հոդված 6**

Մասնակցությունը սույն Համաձայնագրին չի սահմանափակում Կողմերի իրավունքը՝ բարձրագույն որակավորման գիտական և գիտամանկավարժական կադրերի ատեստավորման բնագավառում համագործակցության այլ ձևերի օգտագործելու մեջ:

#### **Հոդված 7**

Սույն Համաձայնագրի իրականացման հետ կապված կոնկրետ հարցերի շուրջ կարող են ստորագրվել լրացուցիչ համաձայնագրեր և արձանագրություններ:

#### **Հոդված 8**

Կողմերի փոխադարձ համաձայնությամբ Համաձայնագրի տեքստում կարող են կատարվել փոփոխություններ և լրացումներ:

#### **Հոդված 9**

Սույն Համաձայնագրի դրույթների մեկնաբանման կամ կիրառման հարցերով տարաձայնություններ առաջանալու դեպքում Կողմերը կվերացնեն դրանք խորհրդակցությունների և բանակցությունների ճանապարհով:

#### **Հոդված 10**

Սույն համաձայնագիրն ուժի մեջ է մտնում Կողմերի կողմից Համաձայնագիրն ուժի մեջ մտնելու համար անհրաժեշտ ներպետական ընթացակարգերի կատարման մասին վերջին գրավոր ծանուցագրի ստացման օրվանից:

Սույն Համաձայնագիրը կգործի հինգ տարվա ընթացքում, և նրա գործողության ժամկետը ինքնաբերաբար կերկարաձգվի հետագա հնգամյա ժամկետներում, եթե Կողմերից ոչ մեկը համապատասխան ժամկետը լրջանալուց 6 ամիս առաջ գրավոր չի ծանուցի Համաձայնագրի գործողությունը դադարեցնելու իր մտադրության մասին:

Կատարված է Մինսկ քաղաքում 2000թ. հուլիսի 19-ին, երկու բնօրինակով, յուրաքանչյուրը՝ հայերեն, բելառուսերեն և ռուսերեն, ընդ որում բոլոր տեքստերն էլ հավասարազոր են: Մեկնաբանման ժամանակ տարաձայնությունների դեպքում առավելությունը տրվում է ռուսերեն տեքստին:

*Համաձայնագիրն ուժի մեջ է մտել 2001 թվականի փետրվարի 6-ից:*